

Liechti Choscht

Ds Isabelle, mini Nichte, het mi a mim Geburtstag zum Znacht yglade. I di neu Scene-Beiz „Hut u Chnoche“. Dert sig's eim nach em Ässe vögeliwohl, me füeli sech liecht wie nes Wölkli. Me chönni sech grad e Monät Schlankheitskur im *Skin slim fitness system Center* spare!

I ha der Chopf gschüttlet über e Schlankheitswahn vo däm Wäse mit sire Model-Figur. Aber es het mi glockt, das „Hut u Chnoche“ mau lehre z kenne.

Auso, mir hei's üs a mim Geburstag im Hut u Chnoche uf de Taburettli bequem gmacht u d'Charte gschtudiert. Entschide hei mer üs für ds Menu „Chnoche-Mizzi's Negativ-Kalorie-Troum.“ Mit emene Kolibri-Bisi-Cüpli hei mer agschtosse. Ds Entrée isch es Magerwise-Heu-Salätli mit eme Gazälle-Gorps-Dressing gsy.

Mir hei gchöit u wider gchöit, u das het is ygschtimmt ufe Houptgang: es Chuehut-Gschnätzlets von ere Chue us der Sahara. Die rari Delikatässe isch uf eme Bett vo gröuchte Heugümper-Bei serviert worde. Während am Ässe isch's mer liecht u liechter worde, i ha richtig gschpürt, wie mini Kalorie-Bilanz immer negativer wird.

Am Isabelle sini Backe si chly bleich worde, fasch durchsichtig. Jtz hets mi dünkt, es längi de öppe! Aber wo mer is das Chuehut-Gschnätzlete hei yverlibt gha, isch der Chällner a Tisch gschwäbt. Er het öppis vo Dessert gsüüslet ...

Mir hei de flambierte Schmättelingsmüntschi nid chönne widerschtah. Mit Nullkalorie-Nydle u zarte Schpähn vo Flohsame garniert si die Schmättelingsmüntschi der Hals dürab grünelet, dass es mer ganz anders worde-n-isch.

Mit letschter Chraft hani dergäge proteschtirt, dass ds Isabelle no-n-es Fakir-Digestif nimmt. Äs het nüt gnützt. Das Meitschi isch bim Trinke immer durchsichtiger u de unsichtbar worde.

Ersch nach fuf Tag, wo der Verdouigsprozäss isch abgeschlosse gsy, isch äs peu à peu wider i Erschynig träte.

Sit däm Geburtstag si mer nie meh i ds Hut u Chnoche.

Eva Schär-Scheidegger